

四庫全書

史部

欽定四庫全書

平定準噶爾方略正編卷四十

乾隆二十二年夏五月辛亥

諭參贊大臣唐喀祿等派兵擒拏哈薩克錫喇

上諭軍機大臣曰成袞扎布等奏稱哈薩克錫喇現在逃至和博克薩里地方等語彼處離北路軍營甚近著派唐喀祿車木楚克扎布領兵擒拏此時成袞扎布等如已將阿逆擒拏並著派兵數百名

遣大員前往和博克薩里會同唐喀祿等兩路夾攻更為妥協再從前搶掠侍衛佛保之逆賊桑濟亦逃至額爾齊斯等處料必與哈薩克錫喇等聚集著一併嚴行查拏毋任免脫

命阿霸垓親王索諾木喇卜坦查拏各部落匪竊賊人

上諭軍機大臣曰索諾木喇卜坦等拏獲擅離卡倫搶奪牲隻賊人晶默特等五十三名請旨正法尚

有未獲賊衆現在領兵赴克爾倫地方查拏等語  
索諾木喇卜坦等辦理妥協所獲賊人著即正法  
餘著嚴行查拏毋任逃脫前命多爾濟等查拏各  
部落匪竊賊衆一味姑息以致賊人紛紛逃竄至  
今尚未完結索諾木喇卜坦既領兵赴克爾倫所  
有車臣汗圖謝圖汗各部落賊人俱著索諾木喇  
卜坦會同各該部落副將軍德木楚克桑察多爾  
濟等逐一查拏以彰國憲多爾濟濟福仍著協同

索諾木喇卜坦辦事瑚圖靈阿德爾森保著即回京

命獎賞都爾伯特郡王策凌烏巴什

上諭軍機大臣曰唐喀祿奏稱接到命往額爾齊斯協同西路大兵擒賊之旨即向策凌烏巴什曉諭策凌烏巴什隨派伊部落護衛巴顏及兵丁三十名同往効力等語策凌烏巴什正值遷移游牧之時與唐喀祿中途相遇即派出護衛兵丁隨同前

往甚屬可嘉著賞給綬足荷包以示獎勵其護衛  
兵丁等俱著照例賞給

署理定邊左副將軍印務策布登扎布等疏奏  
安插噶勒雜特人衆事宜

策布登扎布等奏言噶勒雜特得木齊丹畢根  
敦等所領人衆二百餘戶從前陸續投誠暫行  
歸併扎哈沁游牧居住今詢之扎哈沁公扎木  
禪告稱伊等雖尚屬安靜若另行安插更為妥

協等語查此項噶勒雜特人等投誠以來並無  
事故尚屬安靜猶不至如明噶特特楞古特人  
等賞給索倫為奴應交黑龍江將軍安插奏入  
報

聞

壬子

參贊大臣唐喀祿疏奏領兵赴察罕郭勒堵禦  
賊衆

唐喀祿奏言臣奉

旨領兵赴額爾齊斯等處協同西路大兵擒勦賊衆  
現在選派兵丁起程會同瑚爾起車木楚克扎  
布等前往正值策凌烏巴什遷向內地因告知  
派伊等都爾伯特兵丁之諭伊隨派護衛一員  
兵三十名又詢問如有逃逸之人由何路前來  
我兵在何處堵截據稱額爾齊斯及戈壁烏隆  
古地方此時正多蚊虻不能行走惟察罕郭勒

地方係額林哈畢爾噶哈卜塔克拜塔克等處  
經由道路赴彼堵禦賊衆甚屬緊要臣即領兵  
前往奏入報

聞

癸丑

申諭定邊將軍成袞扎布等速擒阿逆

上諭軍機大臣曰據成袞扎布等奏烏喇特宰桑鄂  
勒錐綽和爾得木齊阿穆呼朗等投赴軍營現在

暫行安撫等語所辦尚合機宜惟伊等並不以擒  
拏阿逆為要務而亟亟以辦理回部為言殊屬不  
知緩急昨已詳悉傳諭伊等果能即擒阿逆則其  
餘賊衆及回人等自可從容辦理若阿逆尚未成  
擒而即深入回部霍集占等畏懼大兵勢必固守  
力拒倘阿逆復煽惑各厄魯特等從中掩襲大兵  
兩路遇敵轉致顧此失彼殊未妥協總之阿逆未  
擒不必即辦理回部此可不再計而決即阿逆未

能剋期擒獲大兵亦不得遽撤或在額林哈畢爾噶或在吐魯番駐劄過冬俟明年再行籌畫從前因阿逆已赴哈薩克未必即能前來而達爾黨阿哈達哈等又稱阿逆遠竄他往相距甚遠竭力追捕必須一月之期是以降旨暫行撤兵詎意大兵方撤賊即潛來皆由達爾黨阿等誤中賊計是以所言皆不足憑今現在賊勢窮蹙正當奮勇追捕勿蹈前轍成袞扎布兆惠等務遵節次諭旨迅速

辦理毋負委任

甲寅

諭參贊大臣永貴等擒拏扎那噶爾布等

上諭軍機大臣曰據兆惠奏永貴等領兵追擒扎那噶爾布尼瑪等至孟克圖嶺尚未成擒現在駐劄地方水草平常移駐於薩里克巴里克等語永貴等既遇賊衆即應奮勇追捕豈有將大兵遠離賊營之理若因水草平常賊衆又何能屯駐扎那噶

爾布尼瑪等雖非阿逆可比既已追及安得疎縱  
著兆惠嚴飭永貴三格等奮勇擒拏毋得稍為退  
諉自取罪戾

丁巳

駐劄巴里坤辦事大臣阿里衮疏奏領兵巡查

臺站日期

阿里衮奏言臣奉

旨帶領兵丁前往巴罕庫蘇一帶巡查臺站遇賊擒

勦臣即揀選兵丁三百名於五月十七日自巴  
里坤起程往來巡查俟叅贊大臣雅爾哈善等  
到時交與接辦臣仍赴巴里坤駐劄奏入報

聞

戊午

命護軍三達色仍赴西路軍營効力

上諭軍機大臣曰已革護軍三達色前同莽噶里克  
所遣回人阿舒爾瑪特同至哈密經駐防總兵祖

雲龍拏獲因三達色在準噶爾年久或有依附賊人情節是以解送來京審訊今訊據三達色自前歲即回軍營隨征効力此次自吐魯番回至哈密亦屬因公差遣並非為莽噶里克所使且熟悉準噶爾情形三達色著加恩仍授護軍發往西路軍營効力

己未

命安插察哈爾之厄魯特等毋庸派令差遣

上諭軍機大臣曰據察哈爾總管巴爾品奏稱前同  
薩喇爾投誠安插察哈爾旗分之佐領察罕鼐濟  
等應與察哈爾一體効力差遣所有應製軍器限  
三年內扣各員俸銀製辦等語所奏甚屬錯謬從  
前同薩喇爾投誠人等安插察哈爾地方原因伊  
等係初降之人加以體卹並非責令差遣且薩喇  
爾曾任佐領並未派令差委今因薩喇爾獲罪即  
令察罕鼐濟等供應差使且扣除俸銀製辦軍器

伊等無知能不妄生疑惑况察哈爾地方有何緊要事務其製辦軍器一事更不必急於辦理設遇調遣自可臨時辦給巴爾品身任總管不知事體冒昧陳奏著嚴行申飭仍將朕旨曉諭察罕奈濟等知之

六月癸亥

命授回人阿卜都賚三品職銜

駐劄巴里坤辦事大臣雅爾哈善等奏言庫爾

勒回人散秩大臣伯克托克托前往庫車等城招服回人現為賊人羈留伊弟阿卜都賚呈請効力軍營情詞誠篤臣等准其所請並賞給孔雀翎以示鼓勵可否照阿濟克伯克色梯巴勒氏噶岱默特之例賞給三品職銜出自

聖恩奏入

上從之

乙丑

命授獎賞藍翎諾爾本等為三等侍衛

上諭軍機大臣曰據兆惠等奏富德等擒獲阿逆宰桑烏巴什遣獎賞藍翎諾爾本解送前來中途遇賊奮勇勦殺等語諾爾本著授為三等侍衛並賜克丑巴圖魯名號賞銀一百兩擒獲烏巴什之領催喀勒扎卜著授為三等侍衛擒獲濟喇特轄特們喀喇之前鋒索卜坦察著授為藍翎侍衛仍各

賞銀五十兩

命叅贊大臣唐喀祿等領兵堵截阿逆

上諭軍機大臣曰據兆惠等奏擒獲阿逆宰桑烏巴什供稱阿逆現在逃往塔爾巴噶台地方等語此言雖不足憑信第塔爾巴噶台地近北路阿逆勢窮力竭或因北路現無大兵駐劄希冀潛赴烏梁海及俄羅斯等處苟延殘喘亦未可定著即傳諭唐喀祿車木楚克扎布等就近領兵前往堵截倘遇賊蹤即行擒勦

定邊右副將軍兆惠等疏奏擒拏厄魯特烏爾  
古勒濟勒等

兆惠等奏言據侍衛奇徹布等報稱拏獲厄魯  
特宰桑烏爾古勒濟勒烏魯木等及所屬人衆  
等語查烏爾古勒濟勒前曾加

恩授為散秩大臣後復附和阿逆應即行正法第據  
供稱現在博羅塔拉地方游牧阿逆曾令其同  
行並未前往尚屬實情且此時正在擒拏阿逆

之時此等賊人似毋庸即行辦理仍令其在原處游牧至烏魯木從前擒拏唐古忒時曾經効力蒙

恩賞給翎頂今聞大兵前來即率屬數十人投至軍營已令其在軍營作為嚮導往擒阿逆其屬人亦仍令在原處游牧俟擒拏阿逆後再行分別辦理奏入報

聞

己巳

諭定邊將軍成袞扎布等籌辦擒賊事宜  
上諭軍機大臣曰此次大兵進剿原為剪滅厄魯特  
賊衆初未料阿逆潛來自投天網是以屢諭成袞  
扎布等將沿途背叛賊人奮勇擒剿其情罪少有  
可原者量為安撫俟兩路大兵會集伊犁後通行  
籌酌辦理以絕根株今大兵甫入即遇阿逆前來  
經參贊大臣富德等屢次擊敗乘勝追逐計日就

擒此時情形又與初次定議時有異所有厄魯特  
賊衆若遽行剪滅伊等聞風畏懼竄入賊中是又  
驅令從逆增其黨援也成袞扎布等應酌量分別  
辦理如遇非真心附逆賊衆令其協擒阿逆不特  
寬免其罪且必加以殊恩將此明白曉諭伊等原  
屬離心且希冀重賞未必無擒賊自効之人成袞  
扎布等務宜妥協籌辦再伊等派額駙色布騰巴  
爾珠爾往擒吞圖布殊屬非是色布騰巴爾珠爾

未經歷練此次命往軍營不過令其隨衆効力以贖前愆若專任勦賊必致悞事現在如鄂寶明瑞等俱經身歷戎行何以並未遣派色布騰巴爾珠爾往擒吞圖布事已二旬此時尚未奏到著即將伊現在情形迅速奏聞

庚午

公素齋瑞馳驛來京

上諭軍機大臣曰吐魯番貝子額敏和卓因加恩封

伊貝子及伊子素賚瑞公爵奏請遣素賚瑞來京  
謝恩額敏和卓及伊子素賚瑞實心報効深可嘉  
予著照所請即令素賚瑞馳驛來京備朕詢問

辛未

諭定邊右副將軍兆惠奮勇擒賊

上諭軍機大臣曰兆惠奏稱接奉諭旨已領兵策應  
富德往擒阿逆所有軍營應辦事宜請交與永貴  
就近辦理等語著即傳諭永貴會同雅爾哈善等

將應行籌辦事宜即行辦理兆惠既領兵前往務同富德協力擒拏首賊以副委任斷不得妄分彼此上年因策楞玉保等互相掣肘迄無成功乃兆惠所深悉當以此為炯鑒毋得更蹈覆轍雅爾哈善現同哈寧阿巡查臺站接到此旨著即速赴永貴駐劄地方會同商辦其臺站事務即交與哈寧

阿辦理

壬申

訓諭領隊大臣額駙色布騰巴爾珠爾

定邊將軍成袞扎布等奏言五月初六日據領  
隊大臣額駙色布騰巴爾珠爾報稱領兵前往  
擒拏吞圖布鄂哲特等沿途勦滅賊衆探知賊  
人逃竄地方在古爾班伯爾克河等處晝夜追  
襲已將賊人游牧人衆盡行勦滅鄂哲特之妻  
亦被擒獲吞圖布鄂哲特僅率三十餘人逃遁  
復令副都統由屯輕騎追逐行至十五里之外

追及吞圖布等奮力擒拏賊人占踞山頂設柵  
堵禦施放鳥鎗色布騰巴爾珠爾復親率侍衛  
等數十人衝入賊隊賊復棄柵逃竄地方險峻  
馬匹晝夜兼行不免疲乏是以未及擒獲等語  
查色布騰巴爾珠爾等帶領八日口糧追賊至  
千有餘里沿途因馬力平常僅率官兵數十人  
追襲雖吞圖布等未經擒獲而斬馘賊衆甚多  
收取馬駝牛羊無算行走尚屬奮勉奏入

上諭軍機大臣曰前成袞扎布等派色布騰巴爾珠爾前往追擒吞圖布等朕即將辦理未善之處傳旨訓諭今果不出所料色布騰巴爾珠爾等既已追及賊人猶且任其脫逃伊等動以官兵馬力疲乏為詞獨不思賊人被追其馬力轉能馳騁乎且既獲駝馬四百有餘何不即以之換給兵丁奮力前往而乃遽爾回兵束手無措實屬怯懦色布騰巴爾珠爾原係獲罪之人今復令其効力軍營以

贖前愆宜如何感激奮勉乃遇此數十垂斃之賊  
尚不思奮勇爭先其罪寧可復逭成袞扎布舒赫  
德等尚稱其斬馘甚多曲為迴護甚屬非是此次  
副都統由屯及隨往官兵等尚屬出力著交部量  
加議敘色布騰巴爾珠爾姑從寬免其治罪仍著  
成袞扎布等派兵三百名交色布騰巴爾珠爾會  
同明瑞前往追擒務將吞圖布等拏獲如再行疎  
縱朕斷不能姑貸

諭定邊將軍成袞扎布等搜捕厄魯特賊衆事宜

成袞扎布等奏言臣等此次進兵由吐魯番前進所有沿途特克斯等處游牧之克勒特烏魯特綽和爾烏喇特伊克商溫都遜集賽等數鄂拓克人等俱在山谷中棲身與額林哈畢爾噶一帶地方聲息不通上年巴雅爾等背叛此數鄂拓克並未附和亦經副將軍兆惠查明臣等暫行安撫不令驚懼又向伊等換取馬匹牲隻

以濟軍行惟查拏錫克錫爾格袞布巴哈曼集等賊衆正法其餘俱令照舊游牧並將宰桑鄂勒錐等帶往軍營効力據稱伊等咸懼哈薩克布魯特搶掠情願遷至哈喇沙爾游牧等語查各鄂拓克內約戶口一千二百有餘應照所請令其遷移並飭令派兵三四百名豫備同往勦滅賊人臣等仍留心察看稍有可疑即行擒勦此等厄魯特俱經辦理妥協縱使阿逆前來亦

無容身之處立可擒獲惟回人霍集占等戕害使臣情罪可惡且據城自守非阿逆窮蹙情形可比應即速往勦滅臣等現在籌辦前往奏入上諭軍機大臣曰成袞扎布等奏稱阿逆現已窮蹙不日即可就擒所有回人霍集占等應即領兵擒拏等語阿逆現在情形自可不日成擒縱令逃遁若俄羅斯哈薩克等處自可索取已詳悉降旨令兆惠等遵照辦理至辦理回人一事成袞扎布等

應將厄魯特等悉行剪除再為籌辦亦經屢降諭  
旨即如吞圖布鄂哲特等雖甚窮蹙而色布騰巴  
爾珠爾等尚未能擒獲又扎那噶爾布尼瑪等相  
距成袞扎布軍營甚近亦未經弋獲此時未便即  
往回城著成袞扎布等即分派大員奮力搜捕毋  
使一人漏網以絕根株其克勒特等鄂拓克懇請  
遷移之一千二百餘戶未據聲明安插何地再伊  
犁地方除此四鄂拓克人等之外尚有何人著一

併查明奏聞辦理

癸酉

訓諭參贊大臣鄂實等

上諭軍機大臣曰鄂實係參贊大臣諸事宜加奮勉  
乃並未領兵前進僅隨同成袞扎布等行走軍營  
事務有成袞扎布及舒赫德二人辦理鄂實並無  
所事伊若自居參贊大臣而將勦捕賊衆之事俱  
推委於諸領隊大臣豈朕簡任之意鄂實著嚴加

申飭明瑞上年進兵哈薩克頗著勤勞此次惟追  
捕巴雅爾時曾奏聞派往現已降旨令同色布騰  
巴爾珠爾擒拏吞圖布等務宜奮勉行走用副委  
任

命獎賞佐領巴顏岱等

上諭軍機大臣曰策布登扎布等奏稱從前逆賊青  
滾雜卜遣班珠爾擅奪馬駝經賽音諾額部落佐  
領巴顏岱等奮力抵禦等語巴顏岱奮勇拒賊甚

屬可嘉署副管旗章京德勒格爾甲拉哈爾齊海  
驍騎校根敦扎卜等協同巴顏岱護送馬駝至烏  
里雅蘇台亦屬奮勉著賞給巴顏岱孔雀翎銀五  
十兩德勒格爾哈爾齊海亦著賞給孔雀翎銀各  
三十兩根敦扎卜著賞給藍翎銀二十兩以示鼓  
勵

參贊大臣哈達哈等疏奏遣派都爾伯特兵丁  
赴軍營効力

哈達哈等奏言臣等奉

旨遣員曉諭策凌等令其酌量情形派出兵丁隨營  
効力今據策凌等告稱策凌烏巴什前已派兵  
三十名交唐喀祿帶往茲復派兵七十名情願  
隨營効力臣即辦給口糧四個月令其赴唐喀  
祿隊內行走奏入報

聞

甲戌

命獎賞烏梁海內大臣察達克

參贊大臣哈達哈等奏言臣等曉諭烏梁海內大臣察達克令其派兵防範西路逃竄賊衆隨據察達克遣人告稱現在於緊要地方安設卡倫三處每處派得木齊一員兵三十名加意防守如遇阿逆及逃竄賊人即行擒拏並豫備兵五百名聽候調遣奏入

上諭軍機大臣曰內大臣察達克因哈達哈等曉諭

防範賊衆事宜即派兵安設卡倫並豫備兵丁聽候調遣察達克感激朕恩實心報効甚屬可嘉著賞給銀五十兩

乙亥

諭定邊將軍成袞扎布等籌辦巴圖爾烏巴什事宜上諭軍機大臣曰前據將軍成袞扎布等奏稱土爾扈特台吉巴圖爾烏巴什等帶兵往擒阿逆續據兆惠等具奏又稱巴圖爾烏巴什係噶爾丹策零

之壻已帶領集賽人等占踞伊犁等語兩處所奏  
情形不同已諭將兆惠奏摺錄寄成袞扎布等籌  
辦嗣經成袞扎布等陸續陳奏辦理各鄂拓克事  
宜且稱伊犁特克斯等處現已寧謐等語但未將  
巴圖爾烏巴什現在情形奏聞若尚未籌辦則伊  
犁安得竟為寧謐著傳諭成袞扎布等速將巴圖  
爾烏巴什等現在駐劄何處及應如何辦理之處  
一面辦理一面奏聞

丙子

諭叅贊大臣雅爾哈善等擒勦賊衆事宜

上諭軍機大臣曰兆惠已領兵往擒阿逆所有軍營事務降旨令雅爾哈善會同永貴辦理現在擒拏扎那噶爾布尼瑪等及勦滅哈丹阿巴噶斯扎哈沁人等游牧俱屬緊要雅爾哈善務宜奮往辦理再勦滅賊衆應帶兵極力搜捕不必專在濟爾哈朗駐劄雅爾哈善到軍營時即遣派三格等分路

擒勦其附近之嗎哈沁等一併勦滅毋留餘孽前  
降旨令額爾登額勦滅扎哈沁賊衆後前往策應  
兆惠今兆惠富德等已經追賊遠往額爾登額諒  
已不能追及著即赴濟爾哈朗聽雅爾哈善等調  
遣

丁丑

諭定邊將軍成袞扎布通籌兩路軍務

上諭軍機大臣曰現在兩路進兵所有額林哈畢爾

噶一帶之厄魯特等或已勦滅或將首賊擒拏其在朱爾都斯等處之各鄂拓克人等經將軍成袞扎布等奏請暫行安撫亦屬妥協惟是伊等聲息相通知額林哈畢爾噶辦理情形其暫行安撫人衆或致妄生疑懼更滋事端成袞扎布等現擬領兵勦滅回部務宜將此等人衆設法安插毋遺後患方為妥協可明白曉諭云因爾等上年並未隨同額林哈畢爾噶衆厄魯特附和為逆是以加恩

寬宥等語庶伊等不生疑懼仍加意防範勿少疎  
虞或將其頭目人等帶往軍中為質或換取伊等  
馬匹牲隻以益兵力其辦理回部事宜必須將各  
處厄魯特盡行辦竣領兵前往一切俱遵照前旨  
辦理至大兵雖分兩路前進而辦理一切事宜皆  
係將軍成袞扎布分內之事即與兆惠會合一處  
亦應聽成袞扎布主持今兆惠已領兵遠往所有  
額林哈畢爾噶一帶事務並著成袞扎布總統辦

理斷不得稍分彼此互相推諉

命賞卹達什達瓦部落人衆

上諭軍機大臣曰達什達瓦部落人等現在生計稍  
艱然能守分謀生毫不滋事甚屬可嘉著查明每  
人各賞銀二兩仍加賞口糧兩個月以示體卹  
命恩卹喀爾喀各部落等

上諭軍機大臣曰喀爾喀各部落游牧原係指定地  
方令伊等互相聯絡以資守望今據索諾木喇卜

坦等奏聞上年因逆賊青滾雜卜煽惑滋擾各部  
落竟有棄其游牧遠徙他處者現在舊游牧地方  
棄地既多奸匪易集以至往來商旅間被搶掠已  
陸續查拏按律治罪地方復得寧靜應令伊等仍  
歸原地方游牧約束屬人共圖生聚庶於伊等生  
計有益再各部落數年來間遇災祲又因軍務未  
竣亟勉急公現有負欠商人銀十餘萬兩著策布  
登扎布詳悉查明動支公項代為清償又上年聞

青滾雜卜背叛之信有將卡倫臺站內馬匹牲隻  
攜回各游牧者本應即令繳還念伊等生計艱難  
並著格外施恩分年展限陸續繳還以紓其力著  
策布登扎布詳悉曉諭各部落王公扎薩克等務  
期仰體朕加恩曲宥之意各謀本業永靖邊隅以  
長享太平之福

命議敘阿霸垓親王索諾木喇卜坦等拏獲搶奪達里

上諭軍機大臣曰索諾木喇卜坦等拏獲搶奪達里

剛愛多倫諾爾等處商民賊人九十餘名俱著照  
所奏即行正法所有各部落王公扎薩克等失察  
之咎本應交部議處但既會同索諾木喇卜坦等  
擒拏賊人不致漏網俱著從寬免議索諾木喇卜  
坦永興辦理妥協著交部議敘

辛巳

諭定邊將軍成袞扎布等勦除賊衆事宜

上諭軍機大臣曰成袞扎布奏稱據侍衛烏爾登呈

報扎那噶爾布尼瑪等帶領千餘戶自額林哈畢爾噶逃往哈什河地方隨派公明瑞內大臣博爾奔察領兵六百名前往策應等語扎那噶爾布尼瑪等皆係要賊現領千有餘戶應多選兵丁務期弋獲今僅派兵六百名尚屬不敷調遣應將永貴所領額林哈畢爾噶一帶兵丁調往協擒方為妥協兩路大兵無分彼此原可互相調用不得歧視且先經永貴等奏稱三格巴寧阿等帶兵堵截扎

那噶爾布等果如所奏賊人何由前往哈什河既  
經逃出三格等曾否尾追著永貴查明具奏扎那  
噶爾布尼瑪等現在伊犁附近地方滋擾應悉行  
勦除方得寧謐現在擒拏阿逆已責成兆惠富德  
等帶兵前往成袞扎布等惟將扎那噶爾布尼瑪  
巴圖爾烏巴什等為首賊人悉行拏獲徐籌辦理  
回部屢經降旨傳諭成袞扎布等應即遵照辦理  
乃節次覽伊等所奏殊未悉合機宜甚屢朕懷伊

等如能於八月初旬內將厄魯特賊衆辦理完竣  
即著領兵進剿回部倘彼時尚需辦理則天氣漸  
寒已屆撤兵之時應在何處駐劄過冬之處遵照  
前旨酌量定議具奏

參贊大臣巴祿疏奏赴軍營日期

巴祿奏言臣於六月初三日抵巴里坤參贊大  
臣雅爾哈善等已起程前赴軍營臣亦於六月  
初七日帶兵二十名前往奏入報

聞

定議解送馬匹事宜

軍機大臣等奏言欽奉

諭旨今歲大兵進剿派撥甘省馬匹甚多現在該省所存馬匹無幾明春尚有需用之處著方觀承於直隸省餵養馬匹內揀選五千匹解送肅州令黃廷桂加意餵養以備應用若何運送之處令臣等

議奏查上年十二月內遵

旨令直隸解送馬五千匹赴軍營調用係由直隸至  
西安西安至甘肅節次更換馬匹解往今若仍  
照前例辦理則西安甘肅馬匹業經調撥所存  
餘馬未必俱堪更換且現在為期尚寬非上年  
急需調撥可比惟應沿途寬予程限善為飼秣  
自可以收實用臣等酌議交與直督方觀承揀  
選馬匹即於七月初旬起程沿途令各省督撫  
豫派員弁接收遞送由直隸至山西西安甘肅

三省分省派委員弁小心餵養務使馬力不致  
疲乏俟至甘省交與總督黃廷桂就近牧放以  
備明春調用節次運解則各省員弁自顧考成  
必不敢生怠玩而為期寬裕原可無悞軍行奏

入

上從之

命定邊將軍成袞扎布來京

上諭軍機大臣曰成袞扎布等領兵勦滅厄魯特賊

衆自可不日告竣其辦理回人事宜即緩至明年亦未為遲且即遣兵辦理回人亦不過派兵四五千名著一大員統領已足勝任亦無庸成袞扎布親往况伊係喀爾喀將軍北路軍營本屬緊要倘阿逆尚未弋獲或逃入北路附近地方應令成袞扎布前往籌畫著傳諭成袞扎布俟拏獲厄魯特賊衆後即行撤兵酌定地方駐劄交與舒赫德等管轄伊即來京面領訓諭

癸未

命拏解原任公品級達瑪林來京

上諭軍機大臣曰據桑寨多爾濟奏稱接署將軍策布登扎布咨遣員同所遣侍衛瑪奇達前往查拏原任公品級達瑪林詎達瑪林先期已赴胡土克圖處現交與尚卓特巴查拏等語達瑪林係附和逆賊青滾雜卜之人罪不容逭是以降旨拏解來京桑寨多爾濟係該部副將軍應即派幹員拏

解乃草率從事以致脫逃復以現交尚卓特巴查  
拏塞責甚屬玩悞桑寨多爾濟在胡土克圖庫倫  
附近居住著即派員速將達瑪林拏解來京毋得  
疎縱

乙酉

命貝子額敏和卓領兵同勦回部

上諭軍機大臣曰成袞扎布等辦理厄魯特賊衆事  
竣即應領兵勦滅回部已降旨令成袞扎布來京

另派大員前往辦理其吐魯番貝子額敏和卓熟悉回人情形著先行傳旨曉諭俟進兵回部時令額敏和卓領兵同往辦理

平定準噶爾方略正編卷四十

欽定四庫全書

史部

平定準噶爾方畧正編卷四十一至四

詳校官監察御史臣孫家賢

通政使司副使臣莫瞻策覆勘

總校官進士臣朱 鈴

校對官編修臣周厚驥

謄錄監生臣汪 澜

欽定四庫全書

平定準噶爾方略正編卷四十一

乾隆二十二年夏六月丙戌

命陞授三等侍衛穆倫保等

上諭軍機大臣曰據唐喀祿等奏稱三等侍衛穆倫  
保索倫委署參領多爾吉勤圖察哈爾委署參領  
托郭齊等俱經効力年久此次隨同進兵中途遇  
賊奮勇勦殺等語著加恩將穆倫保補授二等侍

衛多爾吉勒圖托郭齊俱著補授三等侍衛

丁亥

命獎賞參贊大臣富德等

上諭軍機大臣曰據兆惠奏富德等追襲阿逆已將  
巴爾達穆特各鄂拓克人衆收服阿逆窮蹙奔竄  
如係逃入哈薩克地方即領兵前往擒拏等語富  
德等此次奮勇追襲甚屬可嘉如已經弋獲自可  
竣事若又逃竄他往則應暫行撤兵富德毋庸前

往哈薩克仍遵前旨俟明春再行辦理至奏請將  
巴爾達穆特等各鄂拓克人衆暫在安撫事屬可  
行但伊等若聞現在撤兵明歲仍行前進之語必  
致妄生疑懼致滋事端務湏密行防範富德著賞  
給荷包並發往荷包十個著富德酌量賞給奮勇  
行走之圖倫楚奇徹布等以示鼓勵努三此次亦  
屬奮勉著施恩補授二等侍衛其厄魯特侍衛亥  
楚克扎卜著賞給孔雀翎並銀五十兩所有陣亡

之察哈爾子爵策凌多爾濟著交部照例議卹

戊子

定邊右副將軍兆惠等疏奏擒獲賊人達什策

凌等

兆惠等奏言六月初二日叅贊大臣富德遣員  
押解阿逆之姪達什策凌至軍營親加訊問據  
供上年阿睦爾撒納因為哈薩克衆人不容回  
至布空地方今年二月內在博羅塔拉等處會

集衆厄魯特商議共願推為台吉阿睦爾撒納  
即遣巴布克往告哈薩克求助馬駝牲隻並同  
往掠噶爾藏多爾濟扎那噶爾布等游牧又遣  
宰桑策凌扎卜至和托輝特青亥雜卜處通信  
阿睦爾撒納至濟爾哈朗遇見大兵即行敗走  
逃至伊瑪圖鄂倫淖爾等地方復遣我赴哈薩  
克借兵途中被宰桑塔什拏獲現在阿睦爾撒  
納或仍往哈薩克或逃入俄羅斯俱未可定等

等並據副都統愛隆阿拏獲阿逆遣往烏梁海之  
塔爾巴及烏梁海等九人所供相同應將達什  
策凌解京治罪其餘即行正法奏入報

聞

己丑

諭參贊大臣納穆扎爾等查拏策凌扎卜

上諭軍機大臣曰昨兆惠等奏阿逆之姪達什策凌  
等供稱阿逆曾遣宰桑策凌扎卜至青滾扎卜游

收著傳諭納穆扎爾飭知各卡倫嚴行查拏策凌  
扎卜或竄入烏梁海亦未可定並著曉諭烏梁海  
內大臣察達克派兵緝拏務期戈獲

秋七月辛卯朔

命建

龍神祠於嘉峪關外

上諭大學士曰嘉峪關外路多戈壁從前並無水泉  
今年大兵經過鑿井數處俱得甘泉水勢騰湧普

濟軍行往來商賈亦多利賴此實

神明贊佑所致昔年

聖祖用兵時地湧靈泉曾於托里地方建廟以答

神庥今即照此例交該督敬謹建造該部遵諭具議  
以開

訓諭定邊將軍成袞扎布等

成袞扎布等奏言侍衛烏爾登瑪瑞等擊敗叛

賊扎那噶爾布尼瑪等臣即遣侍衛老格等帶

兵堵截臣鄂寶帶兵接應續烏爾登等報稱扎  
那噶爾布等分路敗逃臣又遣侍衛古爾格勒  
圖等追蹤於六月十一日老格等報稱有布魯  
古特台吉諾諾什為尼瑪喚來相助聞敗潛逃  
被駐劄克勒特之台吉成袞等擒獲老格等收  
其馬駝牲隻其屬下二百餘戶分別辦理又古  
爾格勒圖等報稱在察罕烏蘇阿敦庫里等處  
攻擊布魯古特賽音伯勒克等賊衆奪其寨柵

將男婦數十口勦殺收取牲隻臣等將台吉諾  
諾什派侍衛中秋健銳營前鋒奇木寧解送來

京奏入

上諭軍機大臣曰前因扎那噶爾布尼瑪等為永貴  
三格所敗向喀什河逃去是賊已過額林喀畢爾  
噶與成袞扎布相近而巴圖爾烏巴什亦逃入伊  
犁因令其專辦追擒而以擒拏阿逆等賊付之兆  
惠今成袞扎布等於扎那噶爾布尼瑪既未擒獲

巴圖爾烏巴什亦不知去向所奏鄂寶接應烏爾登及前奏明瑞等與阿巴噶斯餘黨相持俱未有聲息僅擒獲賊黨諾諾什豈便可以此塞責耶且解送諾諾什亦不必使中秋中秋係御前侍衛朕特遣於行間効力倘人不堪用即當叅奏今擒一賊黨輒為派送此必中秋意欲回京藉此自便耳著傳諭阿里衮中秋至巴里坤令其留住其諾諾什即交奇木寧解送嗣後特遣効力之侍衛不當

如此差遣仍將進勦情形作速奏聞

乙未

定邊將軍成袞扎布等疏奏追勦扎那噶爾布等情形

成袞扎布等奏言叛賊扎那噶爾布尼瑪等被我兵擊敗分路逃走經鄂實等帶兵接應六月初九日公明瑞在額卜推嶺口遇賊千餘對敵奪其寨柵追至額林哈畢爾噶之烏里雅蘇台

河賊人占據山崖排列鎗礮一時未能前進乃乘夜率鳥鎗兵二百名往奪其崖賊衆逃脫過半捉生詢問賊之游牧已於初二日遷移留兵舊寨相拒以延時日明瑞等因馬匹疲乏帶兵暫回侍衛烏爾登等亦於本月初六日尋蹤追賊由博羅和羅山口往哈什河源一路山險雪融泥淳難行臣等看賊人蹤跡仍向額林哈畢爾噶越嶺向博羅布爾噶蘇登努勒台逃去現

在永貴駐兵此地與濟爾哈朗相近已行文令其就近派兵堵截奏入報

聞

參贊大臣永貴疏奏追勦巴哈曼集情形

永貴奏言扎哈沁叛賊巴哈曼集恃險立寨副都統額爾登額等雖收其牲隻一時不能攻取續經將軍兆惠派巴圖魯侍衛奎瑪岱等分勦賊黨并令拏獲之厄魯特屬人持書諭降額爾

登額等將博羅通古之賊衆勦殺又問明拏獲  
之人係隨扎哈沁收楞額扎木布前來現據山  
險因持書往諭扎木布不從隨即覓路逃竄又  
捉生訊問巴哈曼集同四得泰帶三百戶口越  
嶺而逃至衛和勒津暫住欲往克勒特烏魯特  
等鄂拓克去隨派總管端濟布接應奎瑪岱尋  
踪追勦并行文將軍成袞扎布侍衛烏爾登等  
協同堵截奏入報

聞

諭定邊將軍成袞扎布等會同勦賊

上諭軍機大臣曰成袞扎布等奏稱追賊扎那噶爾布尼瑪等分路攻擊沿途每遇山谿雨雪賊衆或暫留拒守而游牧遷移遠去看來伊等總未盡力窮追若謂地形險阻賊衆何以能行若謂馬力疲乏豈賊馬獨能壯健鄂寶明瑞等自應尋蹤追襲即不能盡行勦滅而收其牲隻捉生取路自可前

進何至撤回今朕已將擒拿阿逆專委兆惠富德  
即據成袞扎布等奏稱賊人去向與濟爾哈朗相  
近即著永貴專行堵勦至克勒特烏魯特游牧此  
時曾否內移務將此等鄂拓克加意按撫勿令其  
與賊衆相合若賊衆往額林哈畢爾噶恐其侵犯臺  
站著雅爾哈善永貴哈寧阿等留心防範再永貴  
前奏三格拏獲厄魯特和通喀喇告稱賊衆往庫  
克烏蘇會合克勒特烏魯特若大兵追急即遁入

回部已令三格前往追勦則所報情形當在烏爾登之先何以未經奏及著查明覆奏

命將叛賊青袞雜卜之幼子巴里交刑部監禁

丁酉

諭兩路將軍大臣奏報事宜

上諭軍機大臣曰軍營將軍大臣俱可陳奏事件朕曾諭大臣有事告知將軍具奏者因從前軍營將軍大臣各懷意見紛擾無益耳若大臣領兵勦賊

離將軍甚遠何必一一報知轉奏不獨時日稽延  
而伊等奮勉興否亦無由盡知且大臣等若謂報  
明將軍轉奏事體即可完結尤為陋習著諭兩路  
領隊大臣若與將軍相近仍照前旨其分隊領兵  
與追賊遠去者軍前事件不妨自行陳奏

命議處疎脫達瑪林之大臣官員等

署理定邊左副將軍印務策布登扎布等奏言

遵

旨拏問達瑪林因虛銜藍翎護軍瑪奇達前往遲延  
以致脫逃請將瑪奇達與前次差往之虛銜藍  
翎護軍阿隆阿革職治罪臣與阿蘭泰派員不  
慎並請交部議處奏入得

旨策布登扎布初經任事著從寬免議阿蘭泰著嚴  
加議處阿隆阿瑪奇達俱著革退虛銜藍翎護  
軍留於軍營効力贖罪

戊戌

命革原任河南巡撫圖爾炳阿職發往烏里雅蘇台

軍營辦理糧餉事務

己亥

諭吐魯番貝子額敏和卓辦理回部事宜

上諭額敏和卓曰將軍成袞扎布奏請辦理霍集占及波羅泥都朕意於明春進兵已諭知該將軍矣此二賊前被準噶爾囚禁朕特加恩俾仍領舊部乃負恩黨逆戕害我副都統阿敏道其罪必不可

這然皆二賊狡謀其脅從回衆尚屬可宥爾受朕厚恩且係回部望族為衆所信若能設計誘擒或使回衆離心執獻二賊更可不勞師旅爾即酌量辦理若必湏用兵則用兵若干應於何時進剿爾即據所見密奏

辛丑

訓諭定邊將軍成袞扎布等

上諭軍機大臣曰成袞扎布等奏稱軍營會集兵丁

除駐劄臺站外現有三千餘而馬力不足今揀選  
兵丁酌給馬匹共得兵一千九百有奇派三格烏  
爾登由屯旺布多爾濟等分路進剿其馬匹乏弱  
兵丁一千四百餘名撤回於吐魯番休息又將喀  
爾喀兵四百餘名撤回游牧等語辦理殊不可解  
現在扎那噶爾布尼瑪等賊衆俱未擒獲又歸順  
之沙喇斯瑪呼斯等游牧亦當辦理諸事全未就  
緒而遽分兵休息何不於伊犁附近將乏馬牧養

以截逃歸賊衆較之往吐魯番豈不更省跋涉之勞但伊等業經調遣除喀爾喀兵自回游牧外其撤回吐魯番之兵不可至巴里坤仍將吐魯番等處屯種口糧果不足用交巴里坤辦事大臣查奏其三格額爾登額追賊回營據稱未曾遇賊伊等所司何事著明白回奏又擒獲之烏巴什供稱巴圖爾烏巴什現在察罕烏蘇居住等語此地去闔勒奇甚近成袞扎布等應遣人偵探何以未經奏

及而惟以撤兵為事此必出於舒赫德之意又所奏博爾奔察懇留於軍營効力尚知奮勉不似伊等全無籌畫著賞銀一百兩其侍衛中秋所報解送之諾諾什於渡河時欲逃因以刀追刺落水其言支離無據著查明具奏仍將追勦扎那噶爾布尼瑪及現辦巴圖爾烏巴什等情事作速奏聞

命將隨同阿霸垓親王索諾木喇卜坦擒獲賊盜之

台吉官員諾爾津扎卜等交部議敘

丙午

定邊右副將軍兆惠疏奏擒獲叛賊巴雅爾

兆惠奏言臣於五月十九日自濟爾哈朗起程  
六月初二日至額米爾西岸適遇參贊大臣富  
德遣解阿睦爾撒納之姪達什策凌前來准富  
德洛稱遣擒獲之厄魯特特默齊喀喇前往偵  
探阿逆踪跡有曾在卡倫行走之厄魯特侍衛  
袞楚克扎卜等報知阿逆在額卜克特地方距

軍營百餘里賊衆約七百餘人富德隨遣奇徹  
布達禮善努三等領兵前進而身率羅卜藏多  
爾濟愛隆阿圖倫楚等隨往五月初一日至額  
卜克特山探知阿逆已遁遂分路追蹤據達什  
策凌所供阿逆或逃入塔爾巴噶台途次遇奇  
徹布等亦稱賊踪雖有數處總不離塔爾巴噶  
台前後乃分兵四路追勦二十一日見有游收  
踪跡捉生訊問知係叛賊巴雅爾所在逃去已

三日或阿逆亦在其內且巴雅爾亦應擒拏因  
尋踪深入二十四日至塔爾巴噶台山後極險  
處奇徹布等截賊去路羅卜藏多爾濟等從東  
攻入奪險五處夜半時巴雅爾帶眷屬五十人  
逃出因令奇徹布等前往追擒而暫留勦洗餘  
黨收取馬駝亦即前進二十八日驍騎校賽扎  
木蘇擒獲巴雅爾之子塔喇巴勒六月初三日  
愛隆阿報知五月十三日與哈薩克接戰旋即

歸降并奇徹布陣亡之信隨即帶兵接應本日  
至愛呼斯分兵協助圖倫楚達禮善占頗圖海  
蘭察等兩路搜尋仍帶兵前往山梁堵截不移  
時巴雅爾被海蘭察追及猶引弓欲射海蘭察  
射中其肘占頗圖射中其脰始被擒獲并獲其  
妻妹及二子查叛賊巴雅爾於五月二十四日  
夜逃出即令奇徹布等隨踪窮追十有餘日巴  
雅爾繞行塔爾巴噶台三次馬力疲乏始回原

處被擒問以阿逆及哈薩克錫喇所在堅稱不知等語臣竊惟巴雅爾受

恩封汗乃敢附和逆亂實為要犯謹派侍衛額爾登額馬甲獎給孔雀翎海蘭察等將巴雅爾馳驛解京其哈薩克歸順情形并派額爾克沙喇努三前往撫納另摺奏聞奏入得

旨富德著授為內大臣賞給世職貝勒羅卜藏多爾濟封為郡王額爾克沙喇封為公副都統愛隆阿

交部議敘侍衛努三授為頭等侍衛首擒巴雅爾  
之海蘭察其次占頗圖俱授為三等侍衛海蘭察  
賜號額爾克巴圖魯占頗圖賜號塔蘇爾海巴圖  
魯各賞銀一百兩其藍翎侍衛額爾登額等俱交  
部議敘陣亡之侍衛奇徹布察例加倍優卹伊子  
富朱隆阿以頭等輕車都尉世襲在三等侍衛上  
行走

定邊右副將軍兆惠疏奏哈薩克歸順情形

兆惠奏言臣於六月十二日在塔爾巴噶台之薩里地方接參贊大臣富德咨稱貝勒羅卜藏多爾濟副都統愛隆阿等追勦巴雅爾五月三十日至愛登蘇遇賊五十餘人突出拒敵侍衛奇徹布中鳥鎗陣亡賊已敗回又來賊衆二百餘廬戰數次正調後隊接應復有賊衆舉瑪尼纛四桿排立遣人止戰問係何兵答以

天朝征討準噶爾巴雅爾至此遂遣人來告云我等

係哈薩克阿布賚屬下阿布賚遣伊弟阿布勒  
比斯侵擾厄魯特游牧并令如遇

大國之兵即出去歲將軍所發印文為據以來歸  
附適因倉卒不知是以拒戰我等即退兵告知  
阿布賚約於五日內遣人來見將軍叅贊等語  
六月初三日巴雅爾既擒適哈薩克得木齊和  
托圭達木等到營問係阿布勒比斯等問安請  
罪並獻馬二匹告稱我等原不敢擅動兵戈祇

因阿睦爾撒納去歲逃來

大國遣人索取沿邊居住之人未即達知阿布賚  
是以煩

大皇帝征討致游牧驚擾阿布賚欲將阿賊擒獻以  
求安靜先為所覺盜馬逸去近聞厄魯特潰散  
欲乘間取其貨物不期猝遇大兵致彼此傷損  
今特獻馬請罪倘阿賊入我境必行擒送如將  
軍參贊遣人往見阿布賚必遣人請罪并懇帶

兵効力以圖往來交易等語因再三詰問仍如  
前說看其情詞恭順隨遣叅領達里庫等十一  
人同來使往見阿布賚諭以

天朝興哈薩克本無嫌隙因阿逆叛亂逃入爾境爾  
等反為所愚出兵抗拒是以有干征討將軍等  
本欲在爾境過冬俟今春再行進勦

大皇帝仁恩謂若久居爾境恐爾等不得安生故撤  
回大兵並傳諭爾擒獻逆賊今爾等既願歸附

大皇帝自必加恩封賞或更許爾貿易倘此際阿逆竄入爾境務當擒獻否則我將軍現在三路進兵已將準噶爾勦滅必更入爾境矣六月初七日達里庫至愛呼斯河與阿布齊相見隨以前言開導阿布齊始欲與兄弟商酌旋詰以兵臨游牧不便遲延阿布齊云我係為首之人自應主張我等自祖父來未能受中國  
皇帝恩典今情願將哈薩克全部歸順永為

大皇帝臣僕隨具表文並進馬四匹遣使亨集噶爾等七人入

觀又遣使送馬云為臣等賀禮初十日回至富德軍營富德仍約與阿布齊相見來使云阿布齊已帶兵巡查游牧如欲知哈薩克全部懇遣大員前往會同阿布齊查明具奏十三日臣至富德軍營撫慰來使遣達里庫等伴送入京又遣台吉額爾克沙喇侍衛努三等攜緞疋禮物答賀

與所遣使人同往臣等復得使人申明利害諭  
以擒獻阿逆並囑額爾克沙喇等見阿布賚時  
獎其恭順促擒逆賊至查辦各部落但就其情  
願歸附者借來不必相強若言及貿易則告以  
軍營現無商販湏豫行指明處所約定時日以  
便招商備辦阿布賚如求入厄魯特游牧則告  
以疆界不可踰越萬難聽許臣等伏思哈薩克

遠慕

德威歸順屬實倘阿逆仍入其境或可得協擒之力  
否則臣等亦必深入務期擒獲謹將阿布齊所

進托忒字表文錄副馳奏奏入得

旨下部知之尋

命譯進哈薩克阿布齊歸降表文表云哈薩克小汗

臣阿布齊謹

奏中國

大皇帝御前自臣祖額什木汗揚吉爾汗以來從未

得通中國聲教今祇奉

大皇帝諭旨加恩邊末部落臣暨臣屬靡不懼忭感慕

皇仁臣阿布齊願率哈薩克全部歸於鴻化永為中國臣僕伏惟中國

大皇帝睿鑒謹遣頭目七人及隨役共十一人齋捧

表文恭請

萬安並敬備馬匹

進獻謹

奏

丁未

諭哈薩克阿布齊

奉

天承運

皇帝諭哈薩克汗阿布齊朕為天下共主中外一體爾哈薩克為準噶爾所隔未通貢使茲以大兵平

定準部率屬歸誠朕深鑒惡據將軍等奏爾既歸降應加封號並察明游牧朕謂不必過拘爾等僻處遐方非可與喀爾喀諸部比爾稱號為汗朕即加封無以過此或爾因係自稱欲朕賜以封號亦待來奏朕惟期爾部安居樂業俾游牧各仍舊俗即貢獻亦從爾便如遣使入覲朕自優加賞賚至逆賊阿睦爾撤納負恩叛亂誘爾部衆以致游牧不安將軍等奏爾所言如逆賊等逃入境內即當

擒獻朕深信之爾今既向化歸誠則當知準噶爾全  
部悉我疆域宜謹守本境勿闢入侵擾惟我軍凱  
旋後厄魯特等或間有率游牧竄入爾境者爾縛  
獻首惡而收其屬人尚屬可行茲因爾使入覲還  
歸尚需時日先由驛遞馳諭並賜爾大綬四端蟒  
緞二端爾其欽遵朕訓永受無窮之福特諭

命以哈薩克歸降宣諭中外

上諭大學士曰定邊右副將軍兆惠參贊大臣富德

奏稱哈薩克汗阿布賚悔過投誠稱臣入貢等語  
哈薩克一部素為諸厄魯特所畏去歲逆賊阿睦  
爾撒納逃竄往投我師追入其境阿布賚率部落  
遠徙旋欲縛獻逆賊以贖罪為賊所覺遂遁回準  
噶爾今兆惠等率師進剿擒獲叛賊巴雅爾則逆  
賊遊魂其能久逃斧鉞耶況賊所藉以虛張聲勢  
者惟一哈薩克今已歸降願擒賊自効則益無所  
恃朕心為之欣慰此實

上蒼福佑

列祖鴻庥以成我大清中外一統之盛然外間無知者流必又謂其不可深信而以阿睦爾撒納巴雅爾等已降復叛為辭不知哈薩克越在萬里外未嘗遣使招徠乃稱臣奉貢自屬本願則歸斯受之不過略示羈縻如安南琉球暹羅諸國俾通天朝聲教而已並非欲郡縣其地張官置吏亦非如喀爾喀之分旗編設佐領也即準噶爾初歸時亦祇分四

衛喇特令自為理而伊等屢作不靖是以奉行  
天罰哈薩克自非準噶爾近接西陲可比若謂準噶爾  
之事本不當辦則尤不知事理者夫編氓子弟尚  
期析薪負荷況以

兩朝未竟之緒而適值可乘之機乃安坐而失之使天  
下後世傳為遺憾則朕亦何以上對

皇祖

皇考在天之靈耶況如阿睦爾撒納初來時若拒而不

納伊必將蹂躪我喀爾喀屢其劫掠而後已從前  
所降諭旨甚明乃今春南巡時有江南監生張汝  
霖浙江訓導章知鄴妄請從軍摺內有損兵折將  
之語夫草野訛傳本不足論然此等妄徒何嘗有  
忠君愛國之心不過逞其幸災樂禍之口而天下  
之大其無知而造言者正復不少試思以從古不  
入版圖之地定之於三五年間安能保其必無一  
二受傷之人況所用之兵皆我八旗索倫初未嘗

徵發間左調集耕毗如杜甫所哀垂老無家新婚  
諸咏至現在軍需較之雍正年間所費纔十之三  
四而各省偏災之蠲賑河工之動撥一切經費賜  
齋何嘗因此而少減且視昔有加焉較之前代以  
用兵而增稅捐俸者為何如耶朕初非惡逸好勞  
窮兵黷武必以此事侈誇遠略特以國家大事無  
過於此而因勢乘便正為長顧遠慮息事寧人之  
計若以光武之不納鄼善車師為人君感節不知

彼時內亂尚未靖安有餘力他圖若可為之時光  
武亦必為之而可與本朝全盛之時相提並論耶  
總之阿睦爾撒納一日不獲則邊陲一日不寧而  
阿布賚既降則逆賊不患其不獲逆賊既獲則準  
噶爾全局可以從此奏功矣著將哈薩克阿布賚  
降表繙譯宣布中外並將此通行曉諭知之

臣等謹案哈薩克在古康居大宛間漢武帝  
興師伐宛慮康居之救僅得其馬以歸史冊

所傳便為宣威絕域前此遠隔準夷未通聲  
教當策妄阿喇布坦噶爾丹策零時不能兼  
并其地而達瓦齊等則更資其力自是準夷  
內亂

王師深入凶渠逆孽咸以為逋逃藪即哈薩克  
亦未必不扶持兩端貪收小利及遇我偏師  
動輒挫衄乃率其全部傾心內屬

天威所播無遠弗屆觀其奉持將軍印文為納降左

券是內附之心匪朝伊夕我

皇上懷柔偉略

勅諭其君長仍依舊俗各守安全在哈薩克震驚之

餘獲蒙

煦育疇弗感悅於仁至義盡之

淵衷而內附之心益堅即準部全局亦從此大定矣  
至追溯軍興以來既鮮徵發調集之煩經費  
所需亦無嘗少紓建非常之原而默運

神機行所無事誠亘古罕有之隆軌也

申諭參贊大臣唐喀祿等協擒阿睦爾撒納

上諭軍機大臣曰朕昨諭兆惠等擒勦阿睦爾撒納及巴雅爾而以擒拏哈薩克錫喇委唐喀祿今富德等已擒巴雅爾哈薩克又已歸降想阿逆不敢復入或往投俄羅斯現據兆惠等遣兵堵截著傳諭唐喀祿令其留心協勦阿逆或入俄羅斯或往阿爾台務期擒獲仍以擒拏哈薩克錫喇為要再

此二賊或投烏梁海亦未可定並傳諭策布登扎布令其曉諭察達克加意防範

申諭兩路將軍協擒阿睦爾撒納

上諭軍機大臣曰兆惠等已擒獲巴雅爾而逆賊阿睦爾撒納及扎那噶爾布尼瑪巴圖爾烏巴什哈薩克錫喇等尚在逃計此數賊力量已窮惟竄伏山谷以延時日著傳諭兩路將軍若將扎那噶爾布等賊俱擒而阿逆尚未獲則以兩路得勝之

兵如行圍之中軍纛相對捲回使無地可匿昨據  
兆惠等奏恐阿逆竄入俄羅斯因派兵堵截此固  
豫防之善策若竟料其竄入遂生怠心則大不可  
朕意賊人若潛伏僻處候我撤兵再出哨聚則用  
兵何時可已此時兩路軍營湏速以擒賊為事即  
屆撤兵之時只應於濟爾哈朗等處擇地駐劄臨  
期再行具奏不可豫使兵衆知之以致觀望不前  
也

戊申

訓諭定邊將軍成袞扎布等

上諭軍機大臣曰成袞扎布等奏俟辦理綽和爾烏喇特昂吉岱等得其馬匹即選派兵丁赴額林哈畢爾噶爾商辦一應事宜等語殊無頭緒即如巴圖爾烏巴什理應速行查拏所有逃往土爾扈特之言原不可信伊自以為噶爾丹策零之婿且欲為準噶爾總台吉苟非甚迫豈肯遠遁必藏於準噶

爾僻地候我撤兵復回伊犁伊等亦應意料及此若撤兵之後而賊人忽出則誰任其咎耶至所奏沙喇斯宰桑三都克請將游牧內移其瑪呼斯游牧亦願同移當看其情形酌量辦理又三都克往擒瑪呼斯宰桑多爾濟未獲與侍衛托倫泰互許據三都克稟稱托倫泰曾受多爾濟之馬又曾將擒獲正法之回子七人疎脫一名未經具報伊等即應傳喚質訊何得僅行丈巴里坤大臣俟其回

報耶今已傳諭提督豆斌總管五十六將托倫泰  
帶至軍營與三都克面質果有此等事自應正法  
再烏爾登所擒之美諾和什僅一賊犯交把總王  
俊臣帶兵五十名解送尚致脫逃深屬不堪著將  
王俊臣即行正法烏爾登著交部嚴加議處可傳  
諭成袞扎布等速催明瑞就辦理綽和爾等鄂拓  
克之力往擒巴圖爾烏巴什亦即親身前赴伊犁  
之察罕烏蘇等處查拏或逃往他所湏確查具奏

如謂查緝無踪而賊犯忽然生發朕惟伊等是問  
定邊將軍成袞扎布等疏奏酌籌沙喇斯瑪呼  
斯游牧內移事宜

成袞扎布等奏言臣等遣沙喇斯宰桑三都克  
往拏瑪呼斯宰桑多爾濟未回因帶兵前往辦  
理六月二十九日據三都克遣伊屬人並拏獲  
兩和卓木之奸細阿卜都爾瑞前來次日三都  
克親到軍營告稱多爾濟已經逃走現派兵前

往追拏又聞兩和卓木已聚兵豫備我等游牧  
與彼相近移於阿勒輝外吐魯番內傍塔什哈  
山之地過冬今帶馬百匹以助大兵之用等語  
臣等查三都克自入

覲回至軍營節次差遣事件皆伊屬人前往今雖未  
拏獲多爾濟而業與回部有隙明年進剿時令  
為前隊可得其力請遵前奉

諭旨將三都克授總管職銜分管沙喇斯人衆其瑪

呼斯部落願與沙喇斯一同內移臣等察看情形酌量辦理復訊問阿卜都爾瑞據供波羅泥都現居喀什噶爾地方霍集占帶兵七千現居阿克蘇地方因五月間厄魯特錫克錫爾格敗逃恐大兵進剿豫謀防守其前遣之副都統阿敏道與兵丁百人皆為所害嚴禁屬人不許洩露等語謹將霍集占送吐魯番文書譯出併原文恭呈

御覽奏入報

聞

辛亥

定邊將軍成袞扎布等疏奏擒獲叛賊尼瑪

成袞扎布等奏言臣等令侍衛烏爾登副都統  
三格等往擒扎那噶爾布副都統職銜由屯貝  
勒旺布多爾濟等往擒尼瑪臣等相機策應據  
由屯等報稱七月初一日行至哈什河拏獲尼

瑪屬人都噶爾扎卜作為嚮導帶兵二百餘名  
速進初二日黎明到哈什河之阿爾察圖山口  
前隊侍衛占丕納等見賊踪跡遂調集官兵分  
兩翼圍住游牧乘勢攻擊尼瑪等賊衆據山放  
鎗官兵四面叢射賊遂奔潰因追殺賊衆二百  
餘將尼瑪及伊子擒獲其妻女及屬下台吉等  
俱中箭身死收取人口什物馬駝牲隻隨訊問  
尼瑪扎那噶爾布所在據供扎那噶爾布於六

月中旬與呼爾瑞台吉達瓦布魯古特台吉琿齊等相惡已被擒獲因其出痘頗重尚未解送等語適三格等前隊兵到遂告知令其速進仍令都噶爾扎卜前導等語臣等俟尼瑪解到時派員解送來京其眷屬即行正法奏入

上諭軍機大臣曰成袞扎布等奏擒獲叛賊尼瑪並聞扎那噶爾布被擒之信副都統職銜由屯貝勒旺布多爾濟効力可嘉由屯著授為副都統旺布

多爾濟給與郡王品級其首次得功及被傷官兵俱著查明議敘朕昨命兆惠回至濟爾哈朗軍營者特為擒拏扎那噶爾布尼瑪等賊今成袞扎布等業經擒賊已諭令停止前來現在惟擒拏巴圖爾烏巴什搜勦阿巴噶斯哈丹昂吉岱等游牧地方始可寧謐又如色布騰巴爾珠爾疎脫之屯圖卜中秋疎脫之諾諾什王俊臣疎脫之美諾和什亦必查拏擒獲方無後患成袞扎布等其益加奮

勉以奏虜功

定議喀爾喀臺站馬駝事宜

署理定邊左副將軍印務策布登扎布奏言烏里雅蘇台以內喀爾喀二十臺原未官辦馬駝惟派撥臺站之馬甲二十二戶以本身應備馬三匹當差後私馬不敷由四部落公派每臺馬一百匹駝十隻又派兩札薩克協濟其倒斃疲瘦馬駝俱自應補換未免拮据今差務較前頗

少似應將協濟馬駝撤回其喀爾喀二十臺站  
請照喀喇沁臺站例每臺官辦馬五十四駝二  
十隻准以馬三分駝二分按年作為倒斃給價  
買補約計銀三千三百九十兩其所辦馬駝母  
庸給價即就現在馬駝挑選湊足奏入得

旨軍機大臣議奏尋議喀爾喀四部落供應馬駝原  
分內應辦之事但伊等數年來効力軍前又逢  
災歉我

皇上加恩賑貸一切動用官項今北路軍營差務簡  
少應如該將軍所奏喀喇沁既官辦馬駝准將  
協濟之扎薩克等撤回其烏里雅蘇台以內喀  
爾喀二十臺照例官辦馬五十匹駝二十隻於  
臺站內挑選湊足准其按年以馬三駝二銷算  
給價買補仍交該將軍等嚴飭臺員務期買補  
足數加意收養庶教伊等生計有益而公事亦  
無貽悞矣奏入

上從之

乙卯

定邊將軍成袞扎布等疏奏布魯古特台吉琿齊獻扎那噶爾布首級

成袞扎布等奏言據副都統由屯等擒獲尼瑪詢問扎那噶爾布踪跡據稱已被台吉達瓦等擒獲因將情形告知副都統三格并帶都噶爾扎卜為導臣等隨飭令協力擒拏并令事竣後

協同參贊大臣永貴進勦阿巴噶斯等游牧今  
據三格報稱得由屯所告信息於七月初三日  
至博羅和羅遇額林沁達瓦等百餘戶放鎗迎  
敵即突入奪其嶺口捉生詢問知額林沁達瓦  
已逃往安集哈雅正欲進勦初四日早據總管  
端濟布遣人來報適遇琿齊達瓦等率衆投順  
已將扎那噶爾布首級送到琿齊等又將額林  
沁達瓦等招服是以公同商議休息馬匹暫各

回營將陣亡受傷人等查報收取什物牲隻分別解送賞給等因謹據呈具奏奏入

上諭軍機大臣曰成袞扎布等奏稱台吉琿齊達瓦等殺扎那噶爾布獻馘來降又招降額林沁達瓦等語琿齊等殺賊自贖尚可受降若額林沁達瓦始猶抗拒繼迫兵威何得信為降服著傳諭雅爾哈善永貴等俟端濟布將降人送到時曉示琿齊達瓦有擒殺逆賊之勞大皇帝恩旨許爾自贖賞

還原職即來京朝覲爾等游牧亦當內移又向琿  
齊等面示額林沁達瓦爾係被迫投降非伊等之  
比今解送京師候旨看伊等情形稍有猜懼即於  
軍營正法亦可若俱行解送即宜嚴加防範勿致  
脫逃至伊等游牧人衆有強悍可疑者即當勦絕  
所餘戶口或歸併烏魯特鄂拓克內居住酌量辦  
理

平定準噶爾方略正編卷四十一